

Piripos

Pawre kot Piripos kamã Jejus kôt hkwỳjê hwỳr kagà nẽ mẽn

Pawre na pre kagàja nhĩpêx. Jejus nhỹ hã mẽ ahkre o mẽ pa xwỳnhjê hõ na pre. Na pre Jejus ã mẽ kãm hkurê xwỳnhjaja unê nẽ ma krĩ pê Rõm wỳr kumẽ nẽ kamã haxà nhũm mẽ hagjênh xà kamã hkrĩ ho hkrĩ. Tã nhũm arĩ hkrĩ rãhã Piripos kamã Jejus kôt hkwỳjê hwỳr kagàja nhĩpêx nẽ kumẽ. Na prem Pawre jarênh ma nẽ kãm ukaprĩ nẽ. Jakamã axpên kaxyw kàxpore hkwỳ ho akuprõ nẽ hwỳr kumẽ. Hãmri nhũm omu nẽ hkĩnh nẽ amnhĩ tã kagàja nhĩpêx nẽ kamã mẽ kãm amnhĩ jarê nẽ mẽ hwỳr kumẽ. Kot amnhĩ xà htỳx kamã hamak o hkrĩ htã arĩ hwỳr mẽ mrar xwỳnhjê mã Tĩrtũm kapêr jarênh rãhã ho hkrĩ hã amnhĩ jarê. Nẽ kãm Jejus kot amnhĩ nhĩpêx kôt pix mã amnhĩ nhĩpêx o pa hprãm ã amnhĩ jarê. Nẽ kãm Jejus jamaxpêr kôt pix mã hamaxpêr prãm ã amnhĩ jarê. ã na pre Pawre kagàja kamã mẽ kãm amnhĩ jarênh anẽ. Nẽ mẽ kãm:

¹ Pa Piripos kamã Jejus Kris kôt ixkwỳjaja. Xà mẽ amex na ka mẽ apa? E ixpê Pawre na pa mẽ amã kagàja nhĩpêx nẽ kamã mẽ amã amnhĩ jarê nẽ mẽ awỳr kumẽ. Nhũm Ximotre haxwỳja kãm ja mex nẽ. Wa ixpê Jejus mã tanhmã amnhĩ nhĩpêx to ho wa ixpa xwỳnh jakamã na pa wa mẽ awỳr hipêx nẽ kumẽ. Mẽ ate Tĩrtũm kapêr o mẽ ajahkre xwỳnhjê hwỳr nẽ mẽ kãm mẽ ate tanhmã

amnhĩ to xwỳnhjê hwỳr nê mẽ ate mẽ mar o akrĩ xwỳnhjê hwỳr. Mẽ apê Kris kôt wa ixtõ nê wa ixtõxjê ho ixpimràatã mẽ awỳr hipêx nê kumê. ² E kê Mẽpanhĩpêxà maati Tĩrtũm mẽ Pahihti Jejus Kris wa mẽmoj to mẽ akutã nojarêr rãhã nê ka mẽ axàmnhĩx ri ajamakêtkati nê ri apa ho apa.

Pawre kot Piripos nhõ xwỳnhjê ho Tĩrtũm wỳr ã harênh

Epes 1.15-19; Korosẽ 1.9-12

³ Na pa hte xatã mẽ amã ijamaxpêr o ixkrĩ nê mẽ panhõ Tĩrtũm kot tanhmã mẽ ato mex toja pa kãm ijamaxpêr nê ixkĩnh nê ixkrĩ. ⁴ Nê Tĩrtũm mã mẽ ajarênh nê mẽ ato kuwỳ. Ixkĩnh kãm mẽ ato kuwỳ.

⁵ Wam ixte mẽ awỳr inhmõrta ã na pa pre mẽ amã Jejus kot mẽ panê tanhmã amnhĩ nhĩpêx to hã harênh o ri mẽ akôt ixpa. Ka prem inhma nê hkôt amnhĩ xunhwỳr tỳx nê hkôt amnhĩ nhĩpêx o ri apa. Jakamã inhmã axpên kaxyw ri kàxpore hkwỳ nhõr o apa. Te ham mẽ ate ixwỳr mênhta pyrak pa pre mẽ akukwak ri amnhĩm ho ixujaprôr o ri ixpa pê nhãm ri mẽ kãm Jejus jarênh o ri mẽ hkôt ixpa. Na pa hte arĩ jam ijamaxpêr rãhã ho ixkĩnh nê ixkrĩ. Nê Tĩrtũm mã mẽ ate ixto mex ã kãm mẽ ajarênh o ixkrĩ.

⁶ Nê na pa pre ma mẽ awỳr mõ nê mẽ amã Jejus jarê ka prem inhma nê hkôt amnhĩ xunhwỳ nhũm Tĩrtũm ja hã mẽ apumunh mex nê. Hãmri nê mẽ ate hkôt amnhĩ to htỳx kaxyw tanhmã mẽ ato mẽ axihtỳx to. Tã koja arĩ mẽ ato mẽ axihtỳx rãhã nhũm Jejus Kris nhỹrmã akupỳn mẽ pahwỳr wrỳ. Koja ã mẽ ato mex anẽ. ⁷ Na hte tanhmã ixto mex

tota pyrà nē tanhmã mē ato mex to ho pa nē mē akutã nojarêt rãhã ho pa.

Nē kormã mē kot ijaxâr kêt ri pa pre ma mē piitã mē kãm Jejus jarēnh o ri ixpa. Nē ãm hãmri mē kãm harē. Mē kot mar nē hkôt amnhĩ xunhwÿr tÿx kaxyw pa pre mē hkôt harēnh rãhã ho ri ixpa. Ka prem ja kaxyw inhmã kàxpore hkwÿ gõ pa pre ho amnhĩm ixujaprôr pē mē hkôt ri mē kãm harēnh o ri ixpa. Tã nhũm prem jar Rõm kamã ijaxà pa arĩ ixkrĩ htã ka mē axte ixwÿr hkwÿ mē. Jakamã na pa hte mē amã ijamaxpēr rãhã ho ixkrĩ nē inhmã mē akĩnh tÿx nē. ⁸ Te Jejus Kris kãm mē ajapê htÿx pyræk. Tĩrtũm kot ja hã ixpumunh mex.

⁹⁻¹⁰ Na pa hte mē ato kuwÿ nē kãm:

—Pa Tĩrtũm. E Piripos nhõ xwÿnhjê pumu. Na mē ra kãm axpēn kĩnh o axpēn kôt pa. Kwa tanhmã mē hipêx to kê mē arĩ kãm axpēn kĩnh tÿx pix nē. Jao axpēn to mex rãhã ho pa. Nē tanhmã mē hkrã hto kê mē amnhĩ krãm akapēr jaxâr tÿx nē. Jao tãm amnhĩ nhĩpêx mex nē hamaxpēr mex o ri pa. Nom kormã mē kot ja pumunh tohtuj anhÿr. Tã kêr ka tanhmã mē ho kê mē ã amnhĩ nhĩpêx anhÿr rãhã Jejus Kris akupÿn mē ixwÿr wrÿ.

Anhÿr pa hte mē ato hwÿr o ixpa. ¹¹ Nà koja Jejus Kris mē akaxwÿnh kãm mē ato mē axihtÿx ka mē ÿ hã axihtÿx pē tãm ri amnhĩ nhĩpêx nē tãm axpēn nhĩpêx o ri axpēn kôt apa. Nhũm mē piitã ja hã mē apumu nē axpēn mã Tĩrtũm mex o mex ã harē.

*Pawre kãm Kris kôt amnhĩ nhĩpêx prãm ã harēnh
Atre 28.30-31; Epes 6.19-20; Sikũn Ximotre 2.9*

¹² E Kris kôt ixtõ nē ixtõxjaja. Kot paj mē amã tanhmã amnhĩ jarēnh to ka mē inhma. Na prem ra

Jejus ã ixtomnuj tỳx nē hã ijaxà pa amnhĩ xà htỳx kamã ijamak o ixkrĩ. Nom mẽ kot ã inhĩpêx anhỹr tã pa hte arĩ ixkrĩ xà kamã mẽ kãm Jejus jarēnh o ixkrĩ. Jakamã na mẽ ra ohtô nē tanhmã kot mẽ panê amnhĩ nhĩpêx to hã harēnh ma. ¹³ Pôristi kot inhĩhkô hã ixtānopxar xwỳnhjê mẽ ixwỳr mẽ mrar xwỳnh piitã ixte Kris kapêr jahkre ho ixpa pix ã mẽ kot ijaxàr ã ijarēnh ma. ¹⁴ Nē jar Kris kôt mẽ pahtô nē mẽ pahtôxjaja haxwỳja ijarēnh ma nē ohtô nē ixpyrà nē Kris nhỹ hã amnhĩ to htỳx nē arĩ hkwỳjê mã kapêr jarēnh rãhã ho pa. Ixpyrà nē kãm mẽ uma hkêt nē mẽ kutã amnhĩ to htỳx pê mẽ kãm harēnh rãhã ho pa.

¹⁵⁻¹⁸ Nē na pre mẽ hkwỳjjaja ixte mẽ amã Kris jarēnh o ixpa hã ijarēnh ma nē hã ixkamã gryk nē axtem hamaxpêr nē ixwakre kamã gryk kãm mẽ kãm Kris kapêr jarēnh o pa. Na htem hamaxpêr o:

—E kot paj ma Pawre kot ra mẽ hwỳr mōr xwỳnhjê hwỳr mō nē kot ra mẽ kãm Jejus kapêr jarēnh nhĩpy axte mẽ kãm harēnh o ri mẽ hkôt ixpa. Hãmri nhũm mẽ inhma nē inhgryk ã Pawre kaga. Hãmri nhũm mẽ hagjênh xà kamã arĩ hkrĩ tã tee ri mẽ hã ijarēnh ma nē hkaprĩ nē rĩ amnhĩ pumu. Nà kot paj anê.

Anhỹr o hamaxpêr tã pa mẽ harēnh ma nē ixkaprĩ hkêt nē. Mẽ kot mẽ amã hprĩ hã Kris kapêr jarēnh kênã kot pa kêt tee ri mẽ harēnh ma nē ixkaprĩ. Kwãr mẽ mãmri ri ixkamã gryk kãm kapêr jarēnh o ri pa. Pa mẽ harēnh ma nē ixkĩnh nē. Nom na hte mẽ hkwỳjjaja jajê rom kãm ixkĩnh kãm mẽ kãm Kris kapêr jarēnh o pa. Nē tãm hamaxpêr pê mẽ kãm harēnh o pa. Ra mẽ kot ixpumunh mex jakamã nhũm Tĩrtũm kot jar mẽ hwỳr inhmēnh

nhũm ixte ãm hãmri mẽ kãm kapêr mex jarênh o ri ixkrĩ hã ixpumunh mex. Jakamã kwãr mẽ mãmri tanhmã inhmã hamaxpêr to xà hkôt mẽ ujarênh mexja jarênh o pa. Mẽ kãm ixkĩnh kãm harê rý ixkamã gryk kãm ri harênh o pa. ãm hãmri Kris kapêr jarênh o pa jakamã pa mẽ harênh ma nẽ ixkĩnh nẽ.

¹⁹ Nẽ ra mẽ ate ixto Tĩrtũm wýr o apa jakamã koja Karõja ixkaxyw tanhmã jar Rõm kamã pahihtĩ nhĩpêx to nhũm tokyx ixkator japêr. Pa ixãmnhĩx ijamakêtkati nẽ ri ma mẽ akôt ixpa.

²⁰ Nom inhmã Jejus kãm hprãm xà hkôt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh nẽ arĩ kãm tanhmã amnhĩ nhĩpêx to ho ri ixpa. Nom koja mẽ tanhmã hamaxpêr to nẽ xipĩ pa mẽ kutã mẽ kãm amnhĩ to htýx nẽ ixãm rãhã nhũm mẽ xipĩ pa ijamakêtkati nẽ ty. Kê mẽ ja hã ixpumu nẽ ixtã Kris mex o mex ã harê. ãm Jejus kãm hprãm xà hkôt pix mã na inhmã amnhĩ nhĩpêx prãm. ²¹ Tã kot paj tanhmã amnhĩ to nẽ arĩ ixtĩr japêr hã kot paj ãm kôt pix mã amnhĩ nhĩpêx rãhã ho ixpa. Nom koja mẽ tanhmã hamaxpêr to nẽ hã xipĩ pa ty nhũm Tĩrtũm ma kaxkwa hwýr ixkarõ ho àpir kurê kumrêx. Pa Tĩrtũm mẽ Krata wa kuri inhmex o inhmex nẽ wa kuri ixpa ho ixpa. ²²⁻²³ Tã nhỹ na we inhmã mex o hõ jakrenh wehe? Na pa tee ri amnhĩ kukamã ijamaxpêr. Inhmã tokyx ixtyk nẽ Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nẽ arĩ mẽ kãm Jejus kot tanhmã mẽ panê amnhĩ nhĩpêx to hã harênh rãhã ho ri ixpa. Ko. Ja mããnẽn inhmã mex. ²⁴ No mẽ amã na arĩ ixtĩr nẽ ixpaja mẽ amã hprãm ²⁵ jakamã kot paj

për tokyx ixtyk kêt nê. Kot paj arĩ ri mẽ amã Kris kôt mẽ ato mẽ axihtỳx o ri mẽ akôt ixpa. Jao ãm ho hkrãre ka mẽ ra amnhĩ kaxyw kãm ajamaxpër nê hkôt amnhĩ xunhwỳr tỳx nê. Jao akĩnh nê apa. ²⁶Tã kot paj nhỹrmã akupỳm ixtĩr rãhã mẽ awỳr mỗ ka mẽ ixpumu nê akĩnh nê. Jejus Kris kot akupỳm ixkator ã akĩnh nê. Hãmri nê ixtã Jejus mã mex o mex ã harẽ.

Mẽ pahte Jejus ã pahpunuj tã mẽ pahte amnhĩ to htỳx ã mẽ pamã karõ

Rukre 6.22; Sikũn Korĩt 2.14-16; Xiakre 1.12; Jutre 3

²⁷Jakamã e kêt ka mẽ Jejus Kris kapër kôt pix mã amnhĩ nhĩpêx. Nê axpên kôt axpên to axihtỳx pẽ mẽ kãm Jejus kot tanhmã mẽ panê amnhĩ nhĩpêx to hã harênh o ri apa kê mẽ ama nê mẽ pahpyrà nê hkôt amnhĩ xunhwỳ. E kêt ka mẽ ã amnhĩ nhĩpêx anhỳr o ri apa. Kêr pa nhỹrmã mẽ hagjênh xaja rũm ixkator japêr nê nhỹri ja hã mẽ ajarênh ma rỳ ma mẽ anhõ krĩ hwỳr mỗ nê ja hã mẽ apumu nê ixkĩnh nê. ²⁸Nom kwa kêt ka mẽ amã mẽ kot Kris ã tanhmã mẽ ato xwỳnhjê pyma hkêt nê. Mẽ kot tanhmã mẽ anhĩpêx kati hto htã kêt ka mẽ kutã amnhĩ to htỳx nê mẽ hkôt apa. Kêr kê mẽ amnhĩ tã mẽ apumu nê tee ri hamaxpêr hãmri nê axpên mã:

—Kwa mẽ pahte Kris ã tanhmã mẽ hipêx to htã na htem amnhĩ to htỳx nê arĩ mẽ pamã harênh o ri pa. Pêr mẽ kãm mẽ pahpyma hkêt. Mãn hte Tĩrtũm tanhmã mẽ ho nhũm mẽ ỳ hã kãm mẽ pahpyma hkêt nà? Kwa tanhmã kot puj mẽ ho nhũm mẽ Jejus kapêr jarênh o pata kaga? Nà kot puj mẽ ãm tee ri hã tanhmã mẽ ho kaprỳ. Mãn ãm hãmri na

htem nhỹrmã Tĩrtũm kuri htĩr tũm nẽ pa ho pa hã amnhĩ jarẽnh o pa nà? Anẽ.

Koja mẽ ã mẽ ajarẽnh anẽ. Tĩrtũm kot mẽ ato mẽ axihtỳx ã mẽ apumunh kôt. ²⁹ Na pre tanhmã mẽ ato ka mẽ Kris kôt amnhĩ xunhwỳ. Tã mẽ kot tanhmã hã mẽ anhĩpêx to htã na hte Tĩrtũm mẽ kutã tanhmã mẽ ato ka mẽ ỹ hã amnhĩ to htỳx nẽ apa. ³⁰ Ijaxwỳja na pa hte amnhĩ xà htỳx kamã ijamak o ixkrĩ. Na pre htem Jejus ã ixtomnuj o pa ka prem ja hã ijarẽnh ma nẽ hã ixpumu. Tã ota kê mẽ ra axte tanhmã hã inhĩpêx to. Pa kê amnhĩ xà htỳx kãm ijamak o ixkrĩ ka mẽ ijarẽnh ma. Tã xep mẽ ixpyrà nẽ Kris ã amnhĩ xà htỳx kamã ajamak o apa. Nom kwa kêr ka mẽ tee ri amnhĩ kukamã ajamaxpêr o akaprĩ nẽ apa hkêt nẽ.

2

Jejus kãm mẽ pajapê xàj tanhmã kot amnhĩ nhĩpêx to hã harẽnh

Rômãn 15.5-6; Epes 4.1-6; Piripos 2.18

¹ Nẽ ra mẽ pahte Jejus kôt amnhĩ xunhwỳr jakamã pu mẽ tee ri amnhĩ kukamã pajamaxpêr o pahkaprĩ nẽ ri papa hkêt nẽ. ãm kãm mẽ pajapêja mã pajamaxpêr rãhã ho pahkĩnh nẽ pajamakêtkati nẽ ri papa. Nhũm Karõ mẽ pahkarõ mã agjê nẽ mẽ pahto mex nẽ mẽmoj to mẽ pakutã nojarêt o ri mẽ pakamã pa. ² Tã kêr ka mẽ axpên mar mex nẽ mẽmoj tã axpên mã axàkjêr o ri apa hkêt nẽ. Te ri ixkre pixi kamã mẽ atipxi nẽ axpên kôt amnhĩ nhĩpêx pyràk. Nẽ Tĩrtũm kãm hprãm xà hkôt pix mã ajamaxpêr o ri apa. Nẽ mẽ amã axpên kĩnh o

ri apa. Kot kaj mẽ ã amnhĩ nhĩpêx anẽ pa ja hã mẽ apumu rỳ hã mẽ ajarẽnh ma nẽ ixkĩnh tỳx kumrêx.

³ Nẽ kwa kêr ka mẽ axpẽn pumu nẽ ã ajamaxpêr anhỹr kêt nẽ. Mẽ ajamaxpêr o:

—Tk. Kot pa ri tanhmã jahti ho ajuta hto ho ixpa hkêt nẽ. Ixte amnhĩ to rax o hakrenh kênã kot pa hkêt ri ho ajuta. Kê tãm mãn tanhmã ixto ajuta hto.

Anhỹr o ajamaxpêr kêt nẽ. Kêt nhỹri mẽhõ pumu nhũm tanhmã kute ka hã omu nẽ ajamaxpêr o:

—Hêxta waa nẽ. Kwa tanhmã kot pa we ho ajuta htoo?

Anhỹr o ajamaxpêr hãmri nẽ ajamaxpêr xà hkôt tanhmã ho ajuta hto.

⁴ Jao Jejus pyrà nẽ mẽmoj to axpẽn kutã anojarêt o ri apa. No ri amnhĩ pix kukamã ajamaxpêr o apa hkêt nẽ. ⁵ Kêr pu mẽ te Jejus tanhmã hamaxpêr toja pyràk o pajamaxpêr o ri papa.

⁶ Kêp Tĩrtũm Kra kumrêx jakamã te uràk tã xà na pre ja hã amnhĩ pumu nẽ amnhĩ pix kukamã ã hamaxpêr anẽ nẽ hamaxpêr o:

Te ixte Tĩrtũm pyràk jakamã mẽmoj piitã inhõ na. Jakamã kot paj jar kaxkwa kamã inhmex nẽ ixkĩnh nẽ ixpa ho ixpa nẽ aa rer nẽ nhỹhỹm inhmõr kêt kumrêx. Anhỹr o na pre hamaxpêr? Nà na pre ã hamaxpêr anhỹr kêt nẽ.

⁷⁻⁸ Kãm mẽ pajapê xà na pre kaxkwa kamã mẽmoj mex piitã rer pa nẽ man mẽ pahwỳr wrỳ nẽ mẽ pahpyrà nẽ ã ho katorxà nhõhy rũm kato.

Kêp mẽ panhõ Pahihti htã te kêp mẽ panhĩõ nẽ te kot amnhĩ to grire pyràk o amnhĩ nhĩpêx o ri pa.

Ně Tĩrtũm kãm hprãm xà hkôt pix mã amnhĩ nhĩpêx o pa.

Ně ãm kôt pix mã amnhĩ nhĩpêx o pa rãhã nhũm prem kupĩ nhũm arĩ mẽ kãm xa nẽ tanhmã amnhĩ tã mẽhõ hto hkêt nẽ.

Na prem hipêx kati nẽ. Te kêp mẽ kot amnhĩ tomnuj tỳx xwỳnhjê nhĩpêx pyràk o hipêx nẽ pĩ kahpa hã kunhõ nẽ kupĩ.

Tã no nhũm mẽ kêp tanhmã amnhĩmnuj to hkêt nẽ arĩ mẽ kãm xa. Mẽ panê na pre ã amnhĩ nhĩpêx anẽ.

⁹ Hãmri nhũm Tĩrtũm ã kot amnhĩ nhĩpêx anhỹr ã omu nẽ akupỹm ho htĩr nẽ akupỹm amnhĩ wỳr ho api.

Ně mex o mex ã harẽ.

Ně kot nhỹrmã mẽ pahpiitã mẽ pahto amnhĩptàr kaxyw mẽ pakaxyw ãm.

¹⁰ Jakamã kot puj mẽ nhỹrmã pahpiitã Jejus kutã pahkõnkrã ho rôrõk nẽ pahkrĩ hpa nẽ kàx pêê kãm mex o mex ã harẽ.

Mẽ pahpiitãã. Kaxkwa kamã mẽ pa xwỳnhjaja nẽ pika piitã hkôt mẽ papa xwỳnhjaja.

Ně mẽ htyk xwỳnh piitã koja mẽ akupỹn htĩr pu mẽ pahpimràatã Jejus kutã pahkõnkrã ho parõrõk nẽ pahkrĩ hpa nẽ kãm mex o mex ã harẽ.

¹¹ Nẽ kãm:

Pa Pahihti Jejus. Nà ãm hãmri na apê mẽ inhõ Pahi Maati hã apyxi mex na ka.

Jakamã mẽ ixtõ kot paj mẽmoj tã tanhmã amã karõ hto? Nà kot paj mẽ ixtõ ã amnhĩ nhĩpêx anhỹr kêt nẽ. Anẽ.

Kot puj mẽ nhỹrmã ã Jejus mã pakapěr anẽ.

Jao mãânên Tĩrtũm hihtỳx o hihtỳx nẽ àhpumunh o àhpumunh ã omu. Nẽ mex o mex ã omu.

Te mẽ pahpê kanhêti pyràk ã mẽ pajarênh

Matêwre 5.14-16

12-13 Tã kwa ixkràmnhwỳjaja. Inhmã mẽ akĩnh. Kwa kêr ka mẽ arĩ Tĩrtũm kôt amnhĩ nhĩpêx mex rãhã nẽ. Te ixte mẽ akamã ixpare ri mẽ ate amnhĩ nhĩpêx mexta pyràk o ixwakre kamã amnhĩ nhĩpêx mex o ri apa. Na pre ra Tĩrtũm mẽ panê mẽ pahte amnhĩ tomnuj rê nẽ tanhmã mẽ pahto pu mẽ ỹ hã kapêr kôt amnhĩ nhĩpêx o ri papa. Jakamã kwa kêr pu mẽ axte tanhmã amnhĩ tomnuj to ho papa hkêt nẽ. Nẽ mẽ pahte Tĩrtũm kapêr kwỳm ri amnhĩ nhĩpêx pymaj ãm hkôt pix mã amnhĩ nhĩpêx o ri papa.

14 Nẽ kêr ka mẽ mẽmoj to anhỹr kaxyw nẽ agryk kãm tanhmã ri ho hkêt nẽ. Nẽ mẽmoj tã axapênh kaxyw nẽ ri hã axpên mã akapêr kati kamã ho anhỹr kêt nẽ. 15-16 Mẽ kot amnhĩ tomnuj xwỳnhjaja na htem ã amnhĩ nhĩpêx anhỹr o pa. No kêt mẽ kajaja. Mẽ ate mẽ hkôt apa htã kêr ka mẽ hkôt amnhĩ nhĩpêx kêt nẽ. Mẽ kurom mẽ apê Tĩrtũm kra jakamã kêr ka mẽ hkôt pix mã amnhĩ nhĩpêx o ri apa. Nẽ tanhmã amnhĩ tomnuj to rỳ tanhmã ajamaxpêr punuj to hkêt nẽ. Mẽ kot amnhĩ tomnuj xwỳnhjaja te ri kamàt kô kamã ri mẽ kêp àhkĩnh o ri mẽ pa xwỳnhjê kot amnhĩ nhĩpêx pyràk. Tã kot kaj mẽ hkôt tãm ri amnhĩ nhĩpêx o apa nẽ te ate kanhêtiija kamàt kô kamã hirã ho harir pyràk o amnhĩ nhĩpêx. Jao mẽ kãm Tĩrtũm kapêr jarênh o ri mẽ hkôt apa. Mẽ kot amar nẽ apyrã nẽ nhỹrmã kuri hĩr tũm nẽ pa ho pa kaxyw. Kot kaj mẽ ã

amnhĩ nhĩpêx anê nhũm nhỹrmã Jejus Kris akupÿn mẽ pahwÿr wrÿk ã arĩgrota ã pa mẽ apumu nê ixkĩnh nê. Nê ixkĩnh kãm Jejus mã mẽ ajarê nê kãm mẽ ajarênh o:

—Kwa Pahihti. E jajê pumu. Na pa pre mẽ kãm akapêr jarênh o ri mẽ hkôt ixpa nhũm mẽ inhmar tÿx nê nê akapêr kôt amnhĩ nhĩpêx o ri pa. Jakamã na pa pre mẽ kãm akapêr jarênh kaprÿ hkêt nê.

Anhÿr o kãm mẽ ajarê. ¹⁷ Na pa pre mẽ akôt mẽ amã Tĩrtũm kapêr jarênh o ri ixpa ka prem inhma nê hkôt amnhĩ xunhwÿ. Jakamã te ixte Tĩrtũm mã mẽ ato ixkĩnh xà nê kãm mẽ anhõr pyræk.

Nê koja jar Rõm nhõ pahihtija tanhmã ixto hkêt japêr. Rÿ tanhmã ixto. Nom kwâr mẽ mãmri tanhmã kãm ixto hprãm xà hkôt tanhmã ixto rÿ ixpĩ. Koja mẽ ã ixte mẽ anhĩpêx anhÿr ã ixpĩ pa ixkĩnh nê. Nê tanhmã ijamaxpêr to hkêt kãm ty. Jakamã na pa ra ã mẽ kot inhĩpêx anhÿrja kukamã mẽ amã amnhĩ kĩnh ã amnhĩ jarê ka mẽ inhma. ¹⁸ Tã kêr ka mẽ ixpyrà nê ajaxwÿja ixtã akĩnh nê apa.

Ximotre mẽ Eparoxit wa harênh

¹⁹ Nê koja Pahihti Jejus kãm ja prãm hã kot paj ma mẽ awÿr Ximotre mẽ nhũm ma mẽ awÿr mō nê ri mẽ akôt pa nê tanhmã mẽ ate amnhĩ nhĩpêx to hã mẽ apumu. Hãmri nê man akupÿn ixwÿr mō nê inhmã mẽ ajarê pa mẽ ajarênh ma nê ixkĩnh nê tee ri mẽ akukamã ijamaxpêr o ixkrĩ hkêt nê. ãm tãm mẽ akukamã ijamaxpêr o ixkrĩ. ²⁰ Ximotre tapxipix na ixpyrà nê kãm mẽ akĩnh nê kãm mẽ ato ajuta hprãm. Na hte mẽ ajarênh rãhã ho pa. ²¹ Nom jar mẽ piitã Ximotre kĩnhã amnhĩ mex

pix kukamã hamaxpêr o pa nê kãm Jejus Kris kôt tanhmã amnhĩ nhĩpêx to ho pa hprãm kêt nê.

²² Ximotre te kêp ixkra pyræk. Na hte ixkôt pa nê ixpyrà nê Jejus mã tanhmã amnhĩ nhĩpêx mex to ho pa. Pa pre wa ijamê mẽ kãm mẽ ujarênh mex jarênh o wa ri mẽ hkôt ixpa. ²³ Tã koja mẽ tanhmã ixtã axpên mar to. Apu mẽ kot ixpĩr ã amnhĩ jarê rỳ ixkator ã amnhĩ jarê. Pa tanhmã amnhĩ tã mẽ mar to nê rĩ kormã ma mẽ awỳr Ximotre mẽ kê ma mẽ awỳr mō nê mẽ amã tanhmã ijarênh to.

²⁴ Nê koja Pahihti Jejus kãm ja mex pa ijaxwỳja ma mẽ awỳr mō pu mẽ axte axpên pumu.

²⁵ Nê kot paj tokyx ma akupỹm mẽ awỳr Kris kôt mẽ pahtō Eparoxit mẽ. Na ka prem kãm kàxpore gō nhũm man ixwỳr o mō nê inhmã kugō. Hãmri nê jar inhmã àpênh rax nê ixpyrà nê mẽ ujarênh mexja jarênh o pa. ²⁶⁻²⁷ Tã ra à htỳx nê. Kironhỹx pre mẽ pahpê ty. Tã nhũm Tĩrtũm omu nê kamã ukaprĩ nê. Nê mããnên pa ixkamã ukaprĩ nê. Nê tee ri ixte à htỳx ã omunh nê ixkaprĩ htỳx pymaj akupỹm inhmã ho mex nhũm ra akupỹm mex nê ri pa. Hãmri nê kãm mẽ apumunh prãm nê. Mẽ ate à htỳx ã harênh mar nê akaprĩ hã mẽ ajarênh ma nê tee ri mẽ akukamã hamaxpêr. ²⁸ Jakamã inhmã akupỹm tokyx mẽ awỳr mẽnh prãm. Tã koja mẽmo arĩgro hã mẽ awỳr pōj ka mẽ omu nê akĩnh nê tãm ajamaxpêr. Pa ijaxwỳja jar ixkĩnh nê tãm ijamaxpêr. ²⁹⁻³⁰ Na ka prem ixwỳr amẽ nhũm man ixwỳr mō nê jar ixri mẽ kãm Kris kapêr jarênh o ri mẽ hkôt pa rãhã nhỹx hã ty nom kot amnhĩ kamã kahak kêt. Jakamã kê akupỹm mẽ awỳr pōj ka mẽ omu nê akĩnh nê. Nê kahti hkôt amỳ nê ho mex

ně. Kêp Kris kôt mẽ pahtõ mex kênã. ã na htem Kris mã mẽ kot tanhmã amnhĩ nhĩpêx to ho mẽ pa xwỳnhjê nhĩpêx mex anhỹr o pa.

3

Měmoj tã mẽ pahpumunh kôt Tĩrtũm kot tãm mẽ paxunhwỳr ã harěnh

Piripos 2.18, 4.4

¹ E Kris kôt ixtõ nẽ ixtõxjaja. Kris kêp mẽ panhõ Pahihti jakamã kwa mẽ jam ajamaxpěr nẽ akĩnh rãhã ho ri apa.

Na pa ra mẽ amã mẽmoj jarěnh rax nẽ. Nẽ hã kagà rax tã kormã inhmã ja ho anhỹr kaga hkêt nẽ. Kot paj axte mẽ amã hkwỳ hã kagà. Mẽ ate hã ano htỳx nẽ ho apa kaxyw. ² Jakamã e kwa mẽ okora. Kêr ka mẽ amnhĩ nê mẽ kot Tĩrtũm kapěr o hêx xwỳnhjê pumunh mex o ri apa. Na htem tanhmã mẽ amã kapěr ho pa nẽ mẽ amã:

—Kot kaj mẽ ixpê Ijaewjê pyrà nẽ amnhĩ my kwỳt kà jakà hãmri nẽ apê Tĩrtũm kra. Anẽ.

³ Nom ja kot anhỹr kêt. Mẽ pahte amnhĩ jakàr kôt mẽ pahpê Tĩrtũm kra hkêt. ã kot anhỹr ronhỹx pu mẽ amnhĩ krã hkôt tanhmã amnhĩ nhĩpêx to ho pahpê hkra. Nom ja kot anhỹr kêt. Mẽ ate amnhĩ jakàr kêt tã mẽ ixpyrà nẽ amnhĩ kaxyw Jejus Kris mã ajamaxpěr jakamã mẽ ixpyrà nẽ mẽ apê Tĩrtũm kra na ka mẽ. Na ka htem mẽ ixpyrà nẽ Karõ nhỹ hã kãm mex o mex ã harěnh o ri apa nẽ mẽ ixpyrà nẽ Jejus kukwak ri akĩnh nẽ ri apa. Nom na pu htem pahpê hkra kaxyw amnhĩ jakàr kêt nẽ. ⁴ Kop ãm amnhĩ krã hkôt mẽ pahte amnhĩ to Tĩrtũm kra ronhỹx pa ra amnepêm amnhĩ to hkra

ně ri ixpa. Na pa pre ixpê hkra hprãm xàj amnhĩ krã hkôt tanhmã ri amnhĩ nhĩpêx to rax o ixpa nom ã amnhĩ nhĩpêx anhÿr kaprÿ. E pa ja hã mẽ amã amnhĩ jarē ka mẽ ijarēnh ma.

⁵ Na pa pre ixkato ně kormã ixtã semãn pixire nhũm mẽ ixpê Ijaew ã inhmy kwryt kà krãhta. Nom pa ã mẽ kot inhĩpêx anhÿr kôt ixpê Tĩrtũm kra hkêt ně. Ně inhĩpêxà hkôt ixpê finat Pějãmĩ kanrēhã htãmnhwÿ jakamã ixpê Ijaew mex na pa. Ně Ijaew kapēr o ixkapēr o ri ixpa. Nom ja kôt ixpê Tĩrtũm kra hkêt. Ně mǎānēn ixpê Parijew nhõ xwÿnh jakamã na pa pre Tĩrtũm kot finat Mojes mǎ mẽ pakaxyw mẽmoj tǎ karõ kôt pix mǎ amnhĩ nhĩpêx o ixpa hprãm. ⁶ Jao tee ri mẽ kot Jejus kôt amnhĩ nhĩpêx xwÿnhjê pumu ně mẽ homnuj tÿx o ri ixpa. Na pa pre ijamaxpēr o: “Nà mũjjaja na htem mẽ ixkwÿm ri amnhĩ nhĩpêx o pa.” Aně ně mẽ hipêx kati ho ri ixpa. Ně ijamaxpēr o: “Ra ixte finat Mojes kot Tĩrtũm nhÿ hã kapēr piitǎ hkôt amnhĩ nhĩpêx mex jakamã na pa hte tanhmã ri amnhĩ tomnuj to ho ri ixpa hkêt ně.” Aně.

⁷ ã na pa pre ixpê Tĩrtũm kra hprãm xàj amnhĩ nhĩpêx anhÿr o ixpa. Tǎ nom ãm ã amnhĩ nhĩpêx anhÿr hkaprÿ. Na htem ã ri amnhĩ nhĩpêx anhÿr kôt kēp Tĩrtũm kra hkêt ně. Tǎ pa hpǎnhã amnhĩ kaxyw Kris kôt ijamaxpēr nhũm ixto hkra kurē kumrēx.

⁸ Ra ixte Jejus Kris kôt amnhĩ xǎm jakamã Jejus kēp inhõ Pahihtu pa inhmã kapēr kôt pix mǎ amnhĩ nhĩpêx o ri prãm. No hkrax rũm ixte amnhĩ nhĩpêx tũmja na pa ra Jejus gryk ã hkaga hpa. Te ixte mẽmoj punuj pyr ně amnhĩ katut kôt mēnh ně axte kǎm ijamaxpēr kēt pyræk. Jao amnhĩ kaxyw Jejus

kôt pix mã ijamaxpêr o ri ixpa. ⁹ Nom kormã ã ijamaxpêr anhÿr kêt ri na pa pre ixtÿx ri ijamaxpêr o:

—Nà ixte Mojes kot Tĩrtũm nhÿ hã kapêr kôt amnhĩ nhĩpêx o ixpa jakamã koja Tĩrtũm ja hã ixpumu nê ixto hkra.

Anhÿr tã nom ja kot anhÿr kêt. Na htem amnhĩ krã hkôt tanhmã ri amnhĩ nhĩpêx to ho pa nhũm Tĩrtũm ãm ja hã mẽ omu nê ãm hã mẽ omu nê mẽ ho hkra hkêt nê. Nom koja mẽ Kris kôt amnhĩ xunhwÿ nhũm ja hã mẽ omu nê mẽ ho hkra kurê kumrêx. Jakamã ixte Kris kôt amnhĩ xãm ã ixpumunh kôt pix mã na pre ixto hkra nê inhmex ã ijarê. ¹⁰ Hãmri pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupÿm htĩr nê hihtÿx nê àhpumunh tÿx o tanhmã amnhĩ nhĩpêx to ho pa. Tã ijaxwÿja inhmã uràn ã amnhĩ nhĩpêx anhÿr prãm. Nê inhmã uràk nê amnhĩ xà htÿx kutã amnhĩ to htÿx nê ixpa hprãm. Mẽ kot hã ixpĩr mã tã pa uràk nê Tĩrtũm kapêr kaga hkêt nê ãm kôt pix mã amnhĩ nhĩpêx o ri ixpa rãhã uràk nê hã ty. Ja na inhmã ho anhÿr prãm. ¹¹ Kê Tĩrtũm kot hipêxta pyrã nê akupÿm ixto ixtĩr pa wa kuri ixtĩr tũm nê ixpa ho ixpa. ¹² Inhmã Kris kôt pix mã amnhĩ nhĩpêx o ixpa hprãm tÿx kumrêx. Kormã ixte hkôt amnhĩ nhĩpêx o inhmõr nê kormã hatur xàm mênh kêt tã inhmã tokyx hatur xàm mênh prãm. Na pa ã inhmã amnhĩ nhĩpêx anhÿr prãm tÿx kumrêx.

Nê na pa hte ixte amnhĩ tomnuj kêt ã amnhĩ to jarkrar o ri ixpa hkêt nê. Na pa hte arĩ tõhã tanhmã amnhĩ tomnuj to nom inhmã ã amnhĩ nhĩpêx anhÿr prãm kêt. Nê na pa kormã ixprĩ hã Kris kot amnhĩ nhĩpêx mar o inhmõr nê hatur xàm

mënh kêt tâ inhmã hkôt amnhĩ nhĩpêx o inhmõr nê tokyx hatur xàm mënh prãm. Ja kaxyw na pre Jejus Kris amnhĩ kaxyw ixta. ¹³ Na pa hte më akurom papxipix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nê. Nom ra ixte tanhmã amnhĩ tomnuj to ho ixpata pa axte kãm ijamaxpêr kêt nê. Te amnhĩ katut kôt ixte rënh par pyrãk o hipêx nê axte kãm ijamaxpêr kêt nê. Nê Jejus kãm hprãm xà hkôt pix mã amnhĩ nhĩpêx prãm xàj amnhĩ kaxyw kãm ijamaxpêr o ri ixpa.

¹⁴ Koja nhỹrmã Tirtũm ixpê Kris kwỳ hã amnhĩ wỳr ixwỳ nê inhmã:

—E amnê ixwỳr api Pawre. Kot kaj jarãhã amnê më ixwỳr api.

Anhỹr o nhỹrmã inhmã kapêr jakamã na pa hte amnhĩ tâ ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mō. Nà kot paj gaa nê hkôt pix mã amnhĩ nhĩpêx mex o ri ixpa.

¹⁵ Kwa kêr pu më pahpiitã ã pajamaxpêr anê. Jao amnhĩ wỳr hamãr pê hkôt pix mã amnhĩ nhĩpêx o ri papa. Më pahpiitã më pahpê Kris kwỳ kênã. Nom kot ka më atō ja kaxyw tee ri amnhĩ kukamã ajamaxpêr nê ajamaxpêr o:

—Nà tanhmã kot paj we amnhĩ to nê Jejus kôt amnhĩ nhĩpêx mex rãhã o ri ixpa? Ja kaxyw ixãhpumunh tỳxre hã. Anê.

Hãmri nê ã ajamaxpêr anhỹr o apaja apê hihtỳx japêr. Hã koja Tirtũm hprĩ hã tanhmã amã ja kukamã harënh to nê kaxyw ato axihtỳx ka ixpyrà nê hkôt pix mã ri amnhĩ nhĩpêx o apa. ¹⁶ Jakamã kêr pu më ãm Tirtũm kãm hprãm xà hkôt pix mã tanhmã kãm amnhĩ nhĩpêx to ho papa. Ra më

pahte hkôt amnhĩ nhĩpêx o papa xàja kôt pix mã arĩ amnhĩ nhĩpêx rãhã ho papa.

¹⁷ E Kris kôt ixtō nē ixtōxjaja. Na pa ra mē anoo mã Jejus kôt tām ri amnhĩ nhĩpêx o ri ixpa. Tã kêr ka mē ja hã ixpumu nē ixpyrà nē hkôt amnhĩ nhĩpêx o ri apa. Hāmri nē nhỹri mē kot ixpyrà nē ã amnhĩ nhĩpêx anhỹr xwýnhjê hõ pumu nē uràk nē ã amnhĩ nhĩpêx anē. ¹⁸⁻¹⁹ Jejus kot mē pamã mē pahte amnhĩ tomnuj mýrapê pĩ kahpa hã mē panê htykja nhũm mē ra ohtô nē hprĩ hã mar tã hkôt amnhĩ xunhwýr kêt nē. Mē kãm ã kot amnhĩ nhĩpêx anhỹrja ã mar prãm nõkati. Jakamã te mē kãm Jejus kurê xwýnh pyràk. Na htem hã hpijaàm kêt kãm tanhmã ri amnhĩ tomnuj to ho pa. Nē kãm amnhĩ mex pix prãm. Nē tanhmã amnhĩ tomnuj to nē ja hã amnhĩ pumu nē hkĩnh nē. Nom tee ri ja hã amnhĩ pumu nē hkaprĩ nē ri pa hkêt nē. Tã ã mē kot amnhĩ nhĩpêx anhỹr jakamã koja mē nhỹrmã ma mē kot amnhĩ xà htýx kamã hamak o pa tũm xàta wýr hapêx. Nà koja mē ã amnhĩ nhĩpêx anē. Ra ixte mē amã ja hã mē harēnh rax tã pa axte mē amã mē harē. Inhmã mē hkaprĩ hkôt na pa hte xatã mē amã ja hã mē harē. ²⁰ Kêt mē papajaja mē kurom mē pahpê kaxkwa nhõ xwýnh nom kormã. Koja nhỹrmã Jejus Kris akupýn mē pahwýr kaxkwa rũm wrý. Mē papytår xwýnh maati Pahihtija akupýn wrý hāmri nē ma akupým amnhĩ kôt mē pahto api. Jakamã na pu htem arĩ pahkĩnh pē amnhĩ wýr kamã pajamak rãhã ho ri papa. ²¹ Na pu htem jar pyka ja kamã Jejus kĩnhã paxirerek nē pahpunuj nē ri papa. Nom koja nhỹrmã akupýn mē pahwýr wrý hāmri

ně amnhĩ pyrà ně mẽ pamã mẽ panhĩ nyw gõ pu mẽ uràk ně paxihtỳx kãm pahtĩr tũm ně papa ho papa. ã kot mẽ panhĩpêx anhỹr kaxyw àhpumunh o àhpumunh. Tã koja àhpumunh tỳx kãm mẽmoj piitã ho amnhĩptàr pa. Pu mẽ pahpiitã hkôt amnhĩ nhĩpêx mex rãhã ho ri papa.

4

*Pawre kot mẽmoj tã mẽ kãm karõ
Epes 4.3; Piripos 2.2; Korosẽ 3.15*

¹ E Kris kôt ixtõ ně ixtõxjaja. Inhmã mẽ ajapêê. Na pa hte mẽ ato ijamak o ixkrĩ ně mẽ amã ijamaxpêr ně ixkĩnh ně. Něj jar mẽ pahkwỳjê mã mẽ ajarênh o ri ixkrĩ. E kwa kêr ka mẽ arĩ Pahihti kapêr kôt pix mã mãn amnhĩ nhĩpêx mex rãhã ho ri apa.

² Něj wa ka Ewox mẽ Sĩxika wa. Na ka xep hte wa mẽmoj tã axpên kamã agryk rãhã ho ri apa. Kwa wa ã amnhĩ nhĩpêx anhỹrja mã anhũre ně tãm axpên nhĩpêx. Pahihti Kris kôt war ate axpên to war atõx kênã kot ka kêt wa axtem ně mẽmoj tã axpên kamã agryk o ri apa.

³ Něj ka Xikitre. Apê ixkràmnhwỳ mex jakamã kêr ka axpên tã wa nita wa kãm akapêr kãm axihtỳx ně kê war ama ně akupỹm tãm axpên nhĩpêx. Na pre wa ra Kremên mẽ hkwyjê mẽ hpimràatã ixpyrà ně Jejus kot tanhmã mẽ panê amnhĩ nhĩpêx to hã harênh o ri pa. Tĩrtũm nhõ kagà kamã mẽ hixi piitã hikwỹ. Měj pahtĩr tũm ně mẽ papa mã xwỳnhjaja ra Tĩrtũm nhõ kagà kamã mẽ panhĩxi jaxwỳr par.

⁴ Něj kêr ka mẽ apê Pahihti hkwy hã akĩnh ně ri apa. Měj ate ã amnhĩ nhĩpêx anhỹr o apaja na

pa inhmã hprãm tỳx jakamã kot paj axte mẽ amã harẽ. Kwa kêr ka mẽ akĩnh nẽ ri axpẽn kôt apa.

⁵ Pahihti Jejus ra akupỹn mẽ pahwỳr nojarêt jakamã kêr ka mẽ kutêp mẽ piitã ri mẽ ho mex o ri mẽ hkôt apa.

⁶ Nẽ kêr ka mẽ tee ri amnhĩ kukamã ajamaxpêr o ri apa hkêt nẽ. Arĩ amnhĩ to Tĩrtũm wỳr rãhã nẽ. Kot ka mẽ mẽmo arĩgro hã apê amrakati japêr nẽ tee ri ja hã amnhĩ pumu nẽ amnhĩ to awỳ kê mẽ ama nẽ mẽ amã mẽmoj gõ. Rỳ mẽ ate mẽmoj tã hwỳr xwỳnhta tanhmã mẽ amã hipêx to ka mẽ amnhĩ tã omu nẽ kãm:

—Nà ãm hãmri na ka ã inhĩpêx anẽ nẽ inhmã ja gõ Tĩrtũm. Amex o amex.

Anhỳr o kãm amnhĩ jarẽ. ⁷ Kot kaj mẽ ã amnhĩ to hwỳr anhỳr o ri apa nhũm tanhmã mẽ akrã hto ka mẽ mẽ apê Jejus Kris kwỳ hã ajamakêtkati nẽ axãmnhĩx ri apa. Hãmri nẽ mẽmoj tã tee ri amnhĩ kukamã ajamaxpêr o ri akaprĩ nẽ apa hkêt nẽ. ãm akĩnh rãhã ri apa. Tĩrtũm kot tanhmã mẽ pahto nhũm mẽ pajamakêtkati nẽ ri mẽ papaja mẽ pahte amnhĩ tã omunh kêt. ãm tapxipix kot ã mẽ panhĩpêx anhỳr kukamã àhpumunh tỳx.

⁸ E Kris kôt ixtõ nẽ ixtõxjaja. Nà ixkapêr ã kagà jatur xà na ja. Kwa kêr ka mẽ ixujarẽnh mar tỳx nẽ hkôt amnhĩ nhĩpêx o apa.

Nẽ kêr ka mẽ axàpênh mex pix kukamã ri ajamaxpêr o apa.

Nẽ mẽmoj mex pix kukamã ri ajamaxpêr.

Nẽ axpẽn mã akapêr mex pix kukamã ri ajamaxpêr.

Nẽ akatàt kôt akapêr xàptàr pix o axpẽn mã akapêr hkukamã ri ajamaxpêr o ri apa.

Ně tām ri amnhĩ nhĩpêx hkukamã mǎn ajamaxpêr o ri apa.

Ně mẽ piitã ri mẽ ho mex o apa hkukamã ajamaxpêr.

Ně mẽ akapêr mex pix kukamã mǎn ajamaxpêr o ri apa.

E kêr ka mẽ ã amnhĩ nhĩpêx anhÿrja kukamã ajamaxpêr rãhã ho ri apa.

⁹ Ně mẽ akôt ixpare ri na pa pre Kris kôt amnhĩ to mex pix ně tām ixkapêr o ri ixpa. Tã kêr ka mẽ ixpyrà ně ã amnhĩ nhĩpêx aně. Kõja Tĩrtũm ja hã mẽ apumu ně mẽ akôt ri pa ho pa. Kêp mẽ pamã mẽ paxamnhĩx pajamakêtkati xà nhõr xwÿnh na.

Mẽ kot Pawre hwÿr mẽmoj mẽnh nhũm kot omunh ně hkĩnh ã harênh

Sikũn Korit 11.7-9; Piripos 1.5

¹⁰ Ně amnepêm na ka prem xatã tanhmã ixto mex to ho ri apa. Tã axte ã inhĩpêx anhÿr prãm nom mẽ apê awry ně ixpa jakamã ka xep prem tee ri tanhmã ixto mex to hkukamã ajamaxpêr kaprÿ. Tã jar mẽ kot ijaxàr ã ijarênh ma ně ixwÿr Eparoxit mẽ nhũm man ixwÿr mõi ně inhmã kàxporeta gõi. Mẽ amã ijapê hã ixwÿr amě pa omu ně ixkĩnh tÿx ně. Ně ixkĩnh kãm Tĩrtũm mã mẽ ajarê. ãm hãmri na ka prem ixwÿr amě.

¹¹⁻¹² Ně na pa hte tanhmã ixkute htã arĩ ixkĩnh ně ijamakêtkati ně ri ixpa. Jakamã kot pa mẽmo arĩgro hã ixpê amrakati ně inhmã prãm japêr tã no ãm tee ri amnhĩ kukamã ijamaxpêr o ri ixkaprĩ hkêr ně. Arĩ ixkĩnh rãhã ixamnhĩx ri ixpa. Rÿ pa inhõ mẽmoj rax japêr ně mãäněn ixkĩnh ně ixamnhĩx ri ixpa. Na pa pre tõiã inhõ rax ně ixpa.

Ně tōhã inhõ hkêt nẽ ixpa. Tã arĩ ixkĩnh rãhã nẽ ixpa ho ixpa. ¹³ Na hte Kris mẽmoj piitã hkukamã ixtõ ixihtỳx pa ỹ hã mẽmoj kutã ixihtỳx nẽ ixpa. Jao mẽmo arĩgro hã inhmã prãm tỳx nẽ ri ixpa htã ỹ hã kutã ixihtỳx nẽ ixàmnhĩx ri ixpa. ¹⁴ Tã jar ixpunuj nẽ ixkrĩ ka mẽ ijarẽnh ma nẽ ixwỳr kàxpore hkwỳ rẽ. ãm hãmri na ka prem ixwỳr arẽ. ¹⁵ Amnepêm na pa pre mẽ anhõ pika pê Masetõn rùm ixkato nẽ mẽ piitã mẽ kãm Jejus kot tanhmã mẽ panê amnhĩ nhĩpêx to hã harẽnh o ri ixpa ka mẽ xatã ixwỳr kàxpore hkwỳ rẽ pa ho amnhĩm ixujaprôr o ri mẽ hkôt ixpa. Mẽ apê Piripos kamã Kris kôt ixtõ nẽ ixtõx pixjaja na ka prem ã inhĩpêx anẽ. Krĩ hkwỳ kamã Kris kôt mẽ pahkwỳjaja na mẽ akĩnhã ã inhĩpêx anhỳr kêt nẽ. ãm mẽ kapxipix na ka pre ã ixtõ mex anẽ. ¹⁶ Tesarõn kamã ixpare ri na pa pre ixpê amrakati kumrêx nẽ ri mẽ hkôt ixpa ka mẽ xatã ixwỳr kàxpore hkwỳ rẽ pa pre ho amnhĩm ixujaprôr rãhã ho ri mẽ hkôt ixpa. ¹⁷ Nom mẽ ate ixwỳr hkwỳ rẽnh kaxyw mẽ akamã ijamak o ri ixpa hkêt nẽ. Rỳ ijamaxpêr o:

—Ko. Koja Piripos nhõ xwỳnhjaja ijarẽnh ma nẽ kãm ixkaprĩ nẽ ixwỳr kàxpore hkwỳ rẽnh japêr.

Anhỳr o mẽ akukamã ijamaxpêr kêt nẽ. Nom ra mẽ ate ixwỳr hkwỳ rẽnh jakamã koja Tĩrtũm ja hã mẽ apumu nẽ mẽ ato mex nẽ. ã mẽ pahte axpên kutã panojarêt anhỳrja na kãm hprãm.

¹⁸ Tã nhũm Eparoxitja ham mẽ arũm kato nẽ man ixwỳr mō nẽ inhmã kàxporeta gō. Kwa na ka mẽ inhmã òr rax nẽ. Koja tokyx ixpê hapêx kêt pa kritpêm ho ixàpkur o ixkrĩ. Tã ot pa ho kōta nẽ tanhmã hkre kamã kute pumunh xà hkôt hã kagà

ně mẽ awỳr kumẽ. Nà mẽ ate ixwỳr axàmnhõrta na Tĩrtũm omu nẽ ixtã mẽ apumu nhũm ja kãm mex kumrẽx. Te mẽ kot mẽ hkuxwaxà hpâr nhũm mẽ kãm mexta pyræk nhũm ja kãm mex nẽ. ¹⁹ Nà koja Tĩrtũm mẽ apê Jejus Kris kwỳ hã mẽ amã mẽ ate mẽmoj to presija xà nhõr rãhã ho pa. Mẽmoj piitã kêp õ kênã.

²⁰ E kêr pu mẽ Mẽpanhĩpêêxà maati Tĩrtũm mã mex o mex ã harênh rãhã o papa. Ja na inhmã hprãm.

²¹⁻²² Nẽ ot pa mẽ jar ixpiitã mẽ apê Jejus Kris kôt mẽ ixkwỳjê hwỳr kagàja kamã mẽ ixpěr mẽ. Mẽ ixpyrà nẽ mẽ apê Tĩrtũm kra hã. Pa nẽ Kris kôt mẽ pahtõ nẽ mẽ pahtõxjaja. Nẽ Rõm nhõ pahi mã mẽ àpênh xwỳnh kot Kris kôt amnhĩ xunhwỳr xwỳnhjaja mããnẽn. ãm jar mẽ ixpê Tĩrtũm krajê piitã pa mẽ awỳr ixpěr mẽ.

²³ E kê Pahihti Jejus Kris mẽmoj to mẽ akutã nojarêt rãhã nẽ. Jao mẽ ato mex o pa.

Tã ãm ja pix. Ixpê Pawre na pa mẽ awỳr kagàja nhĩpêx nẽ kumẽ.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f